

tomberoit fur eux s'ils negligeoient la vifite de Dieu.

Le lendemain il alla dans quelques autres cabanes, où ayant trouué vne affemblée de plusieurs anciens, il leur parla avec vn afcendant que l'efprit de Dieu luy donnoit. Tous admiroient fon eloquence; (car il parloit les heures entieres dans vn air qu'ils n'auoient iamais veu.) La verité & la raifon, leur dit-il, ne fe trouue que dans la foy; ie ne fuis qu'un enfant, & ferois vn fuperbe fi i'entreprendois de moy-mefme de vous conuaincre: ce n'est pas de moy que ie parle, c'est le maiftre que ie fers qui me donne les penfées, & me rend eloquent à fouftenir fa caufe. Ces vieillards luy firent quantité de queftions, il fatisfit à tous leurs doutes. En fin vn de la troupe leuant vn peu plus haut fa voix: Il eft vray, luy dit-il, que ce que les François t'ont enfeigné eft raifonnable, ie ferois bien d'aduis que nous nous fiffions tous Chreftiens comme toy; mais c'est à noftre Capitaine à parler là deffus, c'est luy qui manie les affaires. Vrayment, repliqua-il, vous auez moins d'efprit que des enfans, fi vos [67] Capitaines fe damnent, voulez vous vous damner avec eux; vn enfant s'enfuiroit qui verroit tous les Capitaines brusler au milieu des flammes. Qui de vos Capitaines vous a iamais appris à bien viure? qui d'eux a defendu le larcin ou l'adultere? tant s'en faut, ils font plus larrons & impudiques que les autres. Il les confondit là deffus, & les contraignit d'aduoüer qu'ils eftoient fans efprit. Apres tout, le Pere le Mercier, auquel apres fon retour ie recommanday d'efcrire tout cecy, puis qu'il y auoit affisté, m'affeura que les paroles qui fortoient toutes de feu de la bouche de ce Chreftien, eftoient receuës dans des cœurs plus froids que des marbres: mais